


TEZAU LITURGIC

19 MARTIE

ACATISTUL SF. CNEAGHINE SOFIA OLELKOVICI DE LA SLUŢK



MOSCOVA, 2000



Акафист святой праведной Софии, княгине Слуцкой

Кондак 1

Избранная отрасли благочестиваго и древняго княжескаго рода, святая праведная мати наша Софие, похвальная пения со умилением воспеваем ти, ты же, яко имущая велие дерзновение ко Господу, потщися, да избавит от бед и скорбей ны, зовущия: Радуйся, праведная Софие, святая молитвеннице о душах наших.

Икос 1

Ангельскою любовью горящи ко Господу от младенчества твоего, Софие праведная, аще и родительскаго воспитания не имевшая, в вере и благочестии возрастала еси под покровом Матере Божия. Мы же таковое о тебе Божие смотрение прославляюще, взываем ти:

Радуйся, родителей благородных чадо боголюбезное;

радуйся, не человеческим, но Божественным смотрением опекаемая.

Радуйся, в младенстве осиротевшая, Господом же не оставленная;

радуйся, под покровом Пресвятыя Богородицы всегда хранимая.

Ра́дуйся, пра́ведная же́но, Пре́мудрости
сои́менная;

ра́дуйся, я́ко по и́мени тво́ем и жи́тие тво́е
просла́вися.

Ра́дуйся, Христо́вой му́дрости нас науча́ющая;
ра́дуйся, о́браз и́стинныя му́дрости нам
показа́ющая.

Ра́дуйся, в за́поведех Го́сподних усер́дно
ходи́вшая;

ра́дуйся, в ско́рбех вре́менных утеше́ние
благое́ получа́вшая.

Ра́дуйся, Христа́ Бо́га ча́до возлю́бленное;
ра́дуйся, пла́мень любве́ ко Го́споду в се́рдце
сво́ем возже́гшая.

Ра́дуйся, пра́ведная Со́фие, свята́я
моли́твеннице о душа́х на́ших.

Кондак 2

Ви́дящи, свята́я Со́фие, по кончи́не роди́телей
себе́ оста́вленну, ко оби́тели Супра́льской
устремилася еси́ и та́мо ти́хое приста́нище
обретши, не то́кмо усты́, но и се́рдцем вопия́ла
еси́ Бо́гу: Аллилу́иа.

Икос 2

Ра́зум Богопросвеще́нный дарова́ся тебе́,
свята́я пра́ведная Со́фие, и́мже проразуме́ла еси́
душепа́губную тще́тность и тле́нность земна́го
бога́тства. И сия́ ве́дящи, Христа́ взыска́ти

вседушно потщалася еси, темже величаем тя и
взываем тебе тако:

Радуйся, с княжескою диадимою венец
Христов соединившая;

радуйся, всем сердцем к жизни вечней
устремленная.

Радуйся, земныя сласти в житии своем
презревшая;

радуйся, жительство безконечное на небесех
предызбравшая.

Радуйся, в Царствие Небесное путем узким и
тернистым шедшая;

радуйся, чистая и непорочная голубице, к
Горнему Миру возлетевшая.

Радуйся, все упование свое на Бога
возложившая;

радуйся, любовью ко Господу присно
пламенеющая.

Радуйся, вся красная мира ни во что же
вменившая;

радуйся, истинную жизнь во Христе обретшая.

Радуйся, ум свой горе устремившая;

радуйся, сердце твое жилище Духа Святаго
соделавшая.

Радуйся, праведная Софиие, святая
молитвеннице о душах наших.

Кондак 3

Силою Божественныя благодати и добрым произволением хотящи отвратити смуту и братоубийство от земли своея, святая Софіе, подвиг служения истине в браце с инославным мужем прияла еси, сего ради благодарно о тебе поём Господеви: Аллилуиа.

Икос 3

Имуще в сердце смирение велие, в святости и чести венчалася еси с мужем своим в православнем храме града Бреста, праведная Софіе. Сего ради с любовью вопием ти:

Радуйся, ради мира крестоношение во брачном житии приемшая;

радуйся, блаженная миротворице, чадо Божие нарекшаяся.

Радуйся, в супружестве благочестно пожившая;

радуйся, домашнюю церковь свою со страхом Божиим создавшая.

Радуйся, закона Христова ревностная исполнительнице;

радуйся, ниву сердца своего от терний душевредных очистившая.

Радуйся, душу слезами покаяния присно орошавшая;

радуйся, молитвенным подвигом Богу угодившая.

Ра́дуйся, землі на́шея духо́вное сокро́вище;
ра́дуйся, Це́ркве Правосла́вныя многоце́нное
украше́ние.

Ра́дуйся, десни́цею Бо́жиею превознесённая;
ра́дуйся, я́ко во смире́нии и крото́сти помяну́
тя Госпо́дь.

Ра́дуйся, пра́ведная Софіе, свята́я
моли́твеннице о душа́х на́ших.

Кондак 4

Бу́рю ви́дящи, воздвиза́емую на ве́ру
Правосла́вную, со дерзнове́нием запове́дала еси́
сохрани́ти ю́ неврежде́нну во владе́ниях
кня́жества Слу́цкаго, да ча́да твоя́ и весь наро́д,
пра́ведная ма́ти на́ша Софіе, правосла́вно
возглаго́лют Христу́: Аллилу́иа.

Икос 4

Слы́шавше лю́дие правосла́внии о вели́це
благоче́стии твоём, пресла́вная Софіе, я́ко
Бо́жиим хра́мом и оби́телем ще́дро благотвори́ла
еси́, и та́ко тёплое благода́рение Го́сподеви
возноша́ху, тебе́ же ра́достное хвале́ние
приноша́ху, вопию́ще си́це:

Ра́дуйся, хра́мов правосла́вных ще́драя
покрови́тельница;

ра́дуйся, ри́зы священни́ческие истка́вшая и
зла́том пребога́то украси́вшая.

Ра́дуйся, за́поведи Христо́вы пра́ведно
исполни́вшая;

ра́дуйся, благоле́пие церко́вное преи́скренне
возлюби́вшая.

Ра́дуйся, земно́е бога́тство ни во что же
вмени́вшая;

ра́дуйся, всемо́гущую си́лу благода́ти Бо́жия
позна́вшая.

Ра́дуйся, градо́в Слу́цка и Ми́нска изря́дное
украше́ние;

ра́дуйся, земли́ на́шей цве́те благоуха́нный.

Ра́дуйся, я́ко тобо́ю и́мя Бо́жие просла́вился;

ра́дуйся, благода́ти Христо́вы пресла́вное
вмести́лище.

Ра́дуйся, ве́ры и́стинныя побóрнице;

ра́дуйся, я́ко тобо́ю благ ве́чных сподо́бля́емся.

Ра́дуйся, пра́ведная Софи́е, свята́я
моли́твеннице о душа́х на́ших.

Кондак 5

Боготе́чная звезда́ яви́лася еси́, свята́я
княги́не Софи́е, во дни пра́зднеств престо́льных
а́ки палóмница богомо́льная посе́щающи хра́мы
Бо́жия земли́ Слу́цкия и та́мо в моли́тве
взыва́ющи ко Го́споду: Аллилу́иа.

Икос 5

Ви́дящи, свята́я Софи́е, я́ко чистота́ ве́ры
Правосла́вныя от разли́чных ко́зней и напа́стей

попира́ется, устро́ила еси́ во гра́де Слу́цке
бра́тство в честь Преобра́жения Госпо́дня, да
все тесни́ми и гони́мии твёрда́го ра́ди стоя́ния
в ве́ре Правосла́вней по́мощь и защище́ние та́мо
обре́тают. Те́мже вопие́м ти:

Ра́дуйся, ра́ди утвер́ждения ве́ры
Правосла́вныя по́двиги духо́вныя подьёмша́я;
ра́дуйся, в зе́млях своих Правосла́вие на ве́ки
сохрани́вшая.

Ра́дуйся, да́же до забвения́ себе́ Христо́ви
ве́рная;

ра́дуйся, ве́ры на́шея испове́днице
дерзнове́нная.

Ра́дуйся, о́браз твёрда́го стоя́ния за ве́ру
Христо́ву нам показав́шая;

ра́дуйся, я́ко за сие́ угото́вася ти сокрови́ще
благ ве́чных.

Ра́дуйся, мно́гия ско́рби за ве́ру Правосла́вную
приим́шая;

ра́дуйся, венце́м испове́дничества́ от Го́спода
украше́нная.

Ра́дуйся, пе́рвая от земли́ Слу́цкия к ли́ку
святы́х причте́нная;

ра́дуйся, ско́рая по́мощнице́ всем, с моли́твой
притека́ющим к тебе́.

Ра́дуйся, му́дрыми твои́ми глаго́лы ве́ру
Правосла́вную утвержда́ющая;

ра́дуйся, во и́стиннем благоче́стии всех наставля́ющая.

Ра́дуйся, пра́ведная Софи́е, свята́я моли́твеннице о душа́х на́ших.

Кондак 6

Пропове́дница ве́лия показа́лася еси́, сла́вная Софи́е, труда́ми и боле́знями твои́ми ве́ру Правосла́вную во граде Слу́цке утвержда́ючи, зе́мли же и ве́си, близ лежа́щая, слéзными моли́твами ороша́ючи и облагоуха́ючи. Мы же, па́мять твою́ почита́юще, благода́рне взыва́ем ко Го́споду: Аллилу́иа.

Икос 6

Воссия́ па́че со́лнца добродéтель твоя́ во граде Слу́цке, ма́ти на́ша Софи́е, я́ко всем в ну́ждах и печале́х прибега́ющим к тебе́ заступница явила́ся еси́. Приими́ и нас, недосто́йных, с любовью́ вопи́ющих ти си́це:

Ра́дуйся, всем правосла́вным кре́пкое прибежи́ще;

ра́дуйся, си́льных ми́ра сего́ превозмо́гшая.

Ра́дуйся, от всех враг ви́димых и неви́димых изрядная заступница;

ра́дуйся, в разрешéнии мирски́х нестроéний ско́рая помо́щнице.

Ра́дуйся, дрéвняго гра́да Слу́цка похва́ло;

ра́дуйся, сла́внаго гра́да Ми́нска утвержде́ние.

Ра́дуйся, Правосла́вия му́жественная
ревнительнице;

ра́дуйся, гоните́лей ве́ры на́шея неустраши́мая
обличительнице.

Ра́дуйся, о́браз любви́ и крото́сти явившая;
ра́дуйся, друг дру́га тяготы́ носити нас
научающая.

Ра́дуйся, на пу́ти спасе́ния на́ше утвержде́ние;
ра́дуйся, в Ца́рствие Бо́жие благонаде́жное
приведе́ние.

Ра́дуйся, пра́ведная Софи́е, свята́я
моли́твеннице о душа́х на́ших.

Кондак 7

Хотя́й Госпо́дь во смире́нии и терпе́нии
укрепи́ти тя, пра́ведная Софи́е, мно́гия ско́рби и
смерть во младе́нстве ча́д твои́х попусти́, да
просвети́шися, я́ко зла́то в горни́ле, и пое́ши
Бо́гу: Аллилу́иа.

Икос 7

Но́вую показа́ла еси́ добродете́ль, свята́я
Софи́е, воздвигши́ храм в честь Пресвяты́я
Богороди́цы, Ея́же Ма́тернему попече́нию и
уме́ршая ча́да своя́ вве́рила еси́, те́мже ты
ублажа́ем та́ко:

Ра́дуйся, не от челове́к, но от Бо́га утеше́ние в
ско́рбех получи́вшая;

ра́дуйся, Чело́веколю́бцу Бо́гу всю себѣ преда́вшая.

Ра́дуйся, лише́ния земна́я благоче́стно понѣсшая;

ра́дуйся, кончи́ну ча́д свои́х я́ко во́лю Бо́жию прие́мшая.

Ра́дуйся, до́брыми тво́ими де́лы просла́вленная;

ра́дуйся, пра́вым изволе́нием се́рдца и ума в жили́ще Боже́ственныя благода́ти предугото́вленная.

Ра́дуйся, терпе́ние крѣпкое и неуста́нное нам пода́ющая;

ра́дуйся, в ско́рбех су́щих луча́ми наде́жды осиява́ющая.

Ра́дуйся, на Го́спода упова́ние неизме́нно возложи́вшая;

ра́дуйся, вене́ц благо́го воздая́ния от Христа́ прии́мшая.

Ра́дуйся, крѣпосте и утеше́ние в беда́х и ну́ждах на́ших;

ра́дуйся, дивна́я ма́ти, благия́ па́мяти досто́йная.

Ра́дуйся, пра́ведная Софи́е, свята́я моли́твеннице о душа́х на́ших.

Кондак 8

Стра́нствие земно́е соверши́вши, свята́я пра́ведная Софи́е, плоти́ю преста́вилася еси́ от

нас, ду́хом же с на́ми всегда́ пребы́ваеши, да и мы с тобо́ю еди́ними усты́ и еди́нем се́рдцем уми́льно воспоём Го́сподеви: Аллилу́иа.

Икос 8

Вси лю́дие правосла́внии воспева́ют тя по досто́янию, достохва́льная Софи́е, Це́рковь же Христо́ва све́тло пра́зднует па́мять твою́ и песнь хвале́бную прино́сит ти си́це:

Ра́дуйся, ве́рность Христу́ до конца́ соблю́дшая;

ра́дуйся, Го́сподем не́ба и землі́ по преста́влении ми́лостивно прия́тая.

Ра́дуйся, милосе́рдие Христо́во на небеси́ обрета́ющая;

ра́дуйся, блаже́нства ве́чнаго дости́гшая.

Ра́дуйся, от злых волко́в ко Христу́, до́брому па́стырю. прибегша́я;

ра́дуйся, во двор сло́весных овец Его́ вше́дшая.

Ра́дуйся, в небе́сных оби́телех водворе́нная;

ра́дуйся, венце́м сла́вы от Бо́га увенча́нная.

Ра́дуйся, у Престо́ла Царя́ царей предста́ющая;

ра́дуйся, со А́нгелы и все́ми святы́ми за ны моля́щаяся.

Ра́дуйся, у Престо́ла Святы́я Трои́цы на́ша предста́тельница;

ра́дуйся, земных и небе́сных благ пред Го́сподем нам усе́рдная ходата́ице.

Ра́дуйся, пра́ведная Софи́е, свята́я моли́твеннице о душа́х на́ших.

Кондак 9

Во всех конце́х земли́ на́шея сла́вится и́мя твоё́, богому́драя Софи́е, я́ко спаса́еши вся ны моли́твами твои́ми от смертоно́сных я́звы, тлетво́рных ветр и о́гненного запале́ния, предстоя́щи ны́не Престо́лу Всевы́шняго Бо́га с ли́ки А́нгелов и свята́ых, воспева́ющих Ему́: Аллилу́иа.

Икос 9

Ветийству́ющий язы́к не мо́жет изре́щи вели́чие благодея́ний твои́х, свята́я Софи́е, мно́жицею явле́нных благоче́стивым супру́гом, непраз́дным жена́м и новорожде́нным младе́нцем. Те́мже вси со благода́рением благоче́стно пою́т ти:

Ра́дуйся, всех скорбя́щих нело́жное утеше́ние;
ра́дуйся, непреста́нное на́ше ра́дование.

Ра́дуйся, му́дрых жен добро́то и похвалё́ние;
ра́дуйся, целому́дренных дев красото́ и удо́брение.

Ра́дуйся, тёплая о нас пред Го́сподем моли́твеннице;

ра́дуйся, изря́дная земли́ на́шея покрови́тельница.

Ра́дуйся, сетей вра́жиих сокруше́ние;

ра́дуйся, правосла́вным лю́дем ве́рное по́може́ние.

Ра́дуйся, ду́шам и телесе́м на́шим вся, я́же к по́льзе подава́ющая;

ра́дуйся, на вся́кое де́ло благо́е премудо́ро нас наста́вляющая.

Ра́дуйся, во вся́ких злоключе́ниях и беда́х нам ско́ро помога́ющая;

ра́дуйся, моли́твенно тя призыва́ющих от внеза́пныя сме́рти изба́вляющая.

Ра́дуйся, пра́ведная Софи́е, свята́я моли́твеннице о ду́шах на́ших.

Кондак 10

Спасе́ния душе́внаго и теле́снаго жела́ющим и о сих усе́рдно подви́зающимся по́мощница благо́ая, пра́ведная Софи́е, яви́лася еси́. Ты бо еси́ засту́пница тружда́ющихся, обре́менённых, в неду́зех и обстоя́ниях су́щих, да вси благодарствен́но взы́вают просла́вльшему́ тя Царю́ сла́вы Христу́: Аллилу́иа.

Икос 10

Стена́ несокруши́мая и огражде́ние кре́пкое явля́ются нам моли́твы твоя́, уго́днице Бо́жия, пра́ведная Софи́е, нетле́нная же и многоцеле́бныя мо́щи твоя́ исцеле́ния и утеше́ния нам неоску́дно источа́ют. Мы же благода́рно велича́ем тя:

Ра́дуйся, жизнь земну́ю благоче́стно
сконча́вшая;
ра́дуйся, вене́ц Ца́рствия Небе́снаго
получи́вшая.

Ра́дуйся, в ра́дости небе́сней ны́не
пребыва́ющая;
ра́дуйся, снѣди райския́ при́сно
наслажда́ющаяся.

Ра́дуйся, со свеще́ю свѣтлою делъ благо́х в
черто́г Христо́в возше́дшая;
ра́дуйся, нетлѣнием и чуде́сы по кончи́не
просла́вленная.

Ра́дуйся, явлѣнием чудото́чных моще́й твои́х
Цѣрковь Христо́ву возвесели́вшая;
ра́дуйся, я́ко тем с ве́рою и любове́нию
поклоня́емся.

Ра́дуйся, притека́ющим к ра́це святы́х моще́й
твои́х цельбы́ пода́ющая;
ра́дуйся, почита́ющим тя благослове́ние и
милости Бо́жия неоску́дно источа́ющая.

Ра́дуйся, лико́в А́нгельских ве́рная
соприча́стнице;
ра́дуйся, оби́телей небе́сных сла́вная
жительнице́.

Ра́дуйся, пра́ведная Софи́е, свята́я
моли́твеннице о душа́х на́ших.

Кондак 11

Пѣ́ние на́ше хвалѣ́бное, а́ще и от усѣ́рдия приносѣ́мое, не дово́льно е́сть ко изъявлѣ́нью се́рдечнаго благода́рѣнія за вся́ блага́я, я́же твори́ши нам да́же до дне́ и часа́ се́го, всечестна́я Софі́е. Мы же в на́пастех и ско́рбех к тебѣ́ прибега́ем, и на твоѣ́ предста́тельство упова́юще, немóлно ко Го́споду взыва́ем: Аллилу́иа.

Икос 11

Свещá многосвѣ́тлая яви́лася еси́, преблаже́нная Софі́е, всем пребыва́ющим во мра́це ве́ка се́го, те́мже и нас, омраче́нных и уны́лых, просвети, во е́же из глубины́ се́рдечныя зва́ти ти:

Ра́дуйся, ве́лие дерзнове́ние ко Го́споду обрѣ́тшая;

ра́дуйся, Спа́са на́шего умилоствивѣ́тельнице пресла́вная.

Ра́дуйся, мрак ду́ш на́ших благода́тно я́ко свети́льник оза́ряющая;

ра́дуйся, любóвь и ве́ру к тебѣ́ иму́щих от вся́ких бед спаса́ющая.

Ра́дуйся, в жити́и своѣ́м пра́вый путь земна́го тече́ния нам показу́ющая;

ра́дуйся, всех ко Христу́ Бо́гу путево́дящая.

Ра́дуйся, жити́ем своѣ́м Го́сподеви уго́дившая;

ра́дуйся, свѣтом Христовым на небеси
осиянная.

Ра́дуйся, яко изыде по всей земли нашей
вещание о чудесех твоих;

ра́дуйся, яко с верою и благоговением
почитаётся память твоя.

Ра́дуйся, Божия снисхождѣния к немощем
нашим всеизрядная ходатаице;

ра́дуйся, за ны пред Господем неусыпная
молитвеннице.

Ра́дуйся, праведная Софіе, святая
молитвеннице о душах наших.

Кондак 12

Благода́ть Божию, прощѣние грехов и
исправлѣние житія испроси нам у Господа
Вседержителя, мати Софіе, да милостив будет к
нам, немощным, смиренно поющим Ему, Спасу
нашему: Аллилуиа.

Икос 12

Поюще многомощное предстательство твоё к
Богу, мати наша Софіе, усердно молим тя:
поминай нас непрестанно у Престола Славы
Царя Небеснаго, ублажающих тя сице:

Ра́дуйся, в сонме святых просиявшая;

ра́дуйся, истинная угодниче Божия.

Ра́дуйся, почести достойная восприимшая;

ра́дуйся, прошением нашим внемлющая.

Ра́дуйся, блаже́нство райское со все́ми
святы́ми унасле́дившая;
ра́дуйся, на твёрди небёсней звездо́
присногоря́щая.

Ра́дуйся, украше́ние Це́ркве, на небеси́
торжеству́ющая;

ра́дуйся, заступле́ние Це́ркве, на земли́
воинству́ющая.

Ра́дуйся, ве́ры на́шей предивна́я поборо́нице;
ра́дуйся, чуде́с Христо́вых сокрови́ще.

Ра́дуйся, от наро́да на́шего правосла́вного
велича́емая;

ра́дуйся, пе́снями хвале́бными прославля́емая.

Ра́дуйся, пра́ведная Софи́е, свята́я
моли́твеннице о душа́х на́ших.

Кондак 13

О, свята́я пра́ведная ма́ти на́ша Софи́е!
Услы́ши ны́нешнее усер́дное моле́ние на́ше и
испроси́ нам у Го́спода и Спаси́теля на́шего
избавле́ние от бед и скорбе́й, от враг ви́димых и
неви́димых, от поги́бели ве́чныя, грёшником
угото́ванныя, да милосе́рдием Христа́ Бо́га
на́шего спаса́еми и твои́м предста́тельством
поспешеству́еми, благоче́стно на земли́ поживе́м,
и сподо́бимся вни́ти во Ца́рствие Его́ Небе́сное,
иде́же благодарственнó со все́ми святы́ми
воспоём Бо́гу: Аллилу́иа.

Молитва

О, святая праведная мати наша, блаженная княгине Софие, прими милостивно приношение веры, надежды и любви нашей и вознеси е ко Господу, и якоже в земнем житии твоём была еси помощница и заступница всем Православным христианом земли твоея, тако и ныне укрепи нас твердо и непоколебимо до смерти стояти за веру Православную, согрей сердца наша любовью ко Господу и Пречистой Его Матери. Умоли Христа Бога нашего, да сохранит Церковь Свою Святую от расколов и ересей, да утвердит в ней дух правыя веры и благочестия, дух ведения и любви, дух мира и радости вечныя, да вся чада ея духом и истиною поклоняются Ему, да укрепит верных в благочестии и святости жизни, да обратит отпадших от Православныя Церкви во святыя недра Ея. О, святая мати, града Слуцка похвало и радости, умоли Господа, да избавит град твой и всю страну нашу от глады, труса, потопа, огня, меча, нашествия иноплемённых, междоусобныя брани и от смертоносныя язвы, да низпослет правителем нашим усердие, мудрость и верность, да управляют и судят по воли Его, да хранят установления Святыя Церкви. Испроси всем с верою молящимся тебе [или: притекающим к раце святых мощей твоих]

ми́рное жити́е, ти́шину, просвеще́ние умо́в и се́рдце, соблюди́ их от ко́зней вра́жиих, от собла́знов ми́ра, во зле лежа́щаго, и от вся́кия ско́рби и ну́жды, обрати́ нас к покая́нию и исправле́нию, да́руй заблудши́м и́стины позна́ние, недугующи́м исцеле́ние. Сохрани́ нас благода́тными твои́ми моли́твами от всех враго́в ви́димых и неви́димых и изба́ви от вся́каго зла, да просла́вим во вся дни жи́зни на́шея Отца́ и Сы́на и Свята́го Ду́ха и твоё заступле́ние во ве́ки веко́в. Ами́нь.

Текст акафиста утвержден решением Священного Синода от 26 декабря 2019 года (журнал № 163).



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

†

НОВОЕ
НЕБО